

Imm 140 Naalakkersuisut suliffeqarfiit Namminersorlutik Oqartussanit piginneqataaffigineqartut Sulisitsisunit ilaasortaajunnaarnissaanut piumasaqarnissaannut Inatsisartunut inatsisissatut siunnersuut.
(Inatsisartunut ilaasorta, Pele Broberg, Naleraq)

Imm 167 Naalakkersuisut Nukissiorfiit, Asiaq Misissueqqaarnerit Namminersorlutik Oqartussanilu suliassaqaarfiit ataani inissisimasut allat Sulisitsisuni ilaasortaannerminnik taamaatitsinissaanut piumasaqarnissaannik Inatsisartunut inatsisissatut siunnersuut.
(Inatsisartunut ilaasorta, Pele Broberg, Naleraq)

Akissuteqaat

(Naalakkersuisut Siulittaasuut)

Siullermeerneqarnera

Naalakkersuisut Namminersorlutik Oqartussat suliffeqarfiutaasa Sulisitsisuni ilaasortaannerminnik taamaatitsinissaannut piumasaqaateqarfigilernissaanut aalajangiiffigisassatut siunnersuummut nassiunneqarsimasumut qujarusupput. Aalajangiiffigisassatut siunnersuuteqarnikkut Namminersorlutik Oqartussat suliffeqarfiutaani piginnittuunerup tunngaviummik eqqartorneqarnissaannut periarfissiisoqarpoq.

Namminersorlutik Oqartussat aktiaateqarluni ingerlatseqatigiiffiutaat Naalakkersuisut aqutugalugit pisortanit pigineqarput, qitiusumillu aqutsineq suliffeqarfinnit siulersuisoqarnikkut ulluinnarnilu aqutsinikkut ingerlanneqarpoq. Aaqquissuusaanerup taamatut ingerlanneqarnerata akisussaaffeqarfiup piginnaasallu Naalakkersuisut piginnittuusutut suliffeqarfiillu siulersuisoqarnermikkut aqutsisoqatigiinnermikkullu suliffeqarfinnik aqutsinermi nammaqatigiissumik eqqortumillu ingerlanneqarnissaanik qulakkeerinnissaq.

Periuseq taanna taperserniarlugu 2023-mi Namminersorlutik Oqartussat aktiaateqarluni ingerlatseqatigiiffiutaat piginnittuunermut politikissaanik politikikkut atsioqatigiinnikkut isumaqatigiittoqarpoq Inuit Ataqatigiit, Siumut, Atassut aamma Demokraatit peqataaffigisaanik. Isumaqatigiissut tamanna tunngavigalugu aqutsinissamut allagaqaammik ilaatigut sunnerneqarani aalajangiisinnaassuseq Naalakkersuisullu aallussilluni piginnittuunera pillugu nassuiaammik suliarinnittoqarpoq.

Sunnerneqarani aalajangiisinnaassutsip Namminersorlutik Oqartussat ingerlatseqatigiiffiisa patajaatsumik qularnaatsumillu ingerlanneqarnissaanut qulakkeerinninnissamut pingaaruteqarlunnarpoq. Tamanna suliffeqarfiup suliffeqarfimmut siursaaataasussanik suliniuteqarnissaminnik attaveqatigiinnernillu soqutigisaminnik ingerlatsisinnaanerannik matumanilu peqatigiiffimmut Sulisitsisunut ilaasortaannermi, naliliisinnaassuseqarnissaannik imaqarpoq. Attaveqatigiinnerit taamaattut suliffeqarfiit iluinni misilittakkanik attaveqatigiilernernillu pilersitsisarput siunissamilu suliffeqarfimmut iluaqutaasinnaallutik.

Taamaattorli Naalakkersuisunit isertuanngitsumik akisussaassuseqartumillu Namminersorlutik Oqartussat ingerlatseqatigiiffiisa ingerlanneqarnissaanik pisariaqartitsisoqartoq akuersaarneqarpoq, tamanna aamma suliffeqarfinnut namminersortitaniit naalakkersuisoqarfinnut attuumassuteqartunut attaveqatigiinnermi atuuppoq.

Tamanna tunngavigalugu Naalakkersuisut allannguutissatut manna saqqummiuppaat:

“Naalakkersuisut pisussaatinneqassasut ingerlatsiteqatigiiffiit Namminersorlutik Oqartussanit pigineqartut kiisalu namminersortitat attaveqatigiinnermut tunngasunik sulialinnik kattuffinnut aningaasartuutinik annertuunik aningaasartuuteqartitsisartunik ilaasortaanerat pillugu soorlu assersuutigalugu Sulisitsisut ingerlaavaartumik oqaloqatigiittarnissaat Inatsisartunut aalajangiiffigisassaattut siunnersuutigaat”